

maull ghar vnbedechtig gewaschenn, wieder die reinen Lehrer alhie sich trozig auffgelehnet, Lutherum mit seinen Schrifften vnd bekentnissen zum höchsten verachtet vnd die Calvinisten vertediget vnd für vnschuldich außgeruffen, vnd ob ehr woll zw ezlichen malen darüber schewßlich angelauffen vnd ghar hartt ist gestraffet worden, also daß ehr auch wie Keineke Fuchs ezliche mall poenitentiam simuliret vnd sich zw bessern hat angelobet, so ist dennoch auß anstiftunge des Hoffarts- vnd Sauffsteuffels dieser vnflath in ihm je leng je grosser geworden, den ehr auch so weidlich außgespeiet, daß zw besorgen, wo ihm nicht inn der Zeit wurde gesteuwert, ein grosser vnfall dieser löblichen Kirchen vnd gemein zwgefugt vnd ein feuer, das man nicht so baldt loschem köntt, mucht angezündet werden. Dieser vhrsachen halben haben wir, die verordenten diener des Ministerii alhie zw Hannover diese hoge nötige vnd wichtige sache, vnser gewissens vnd tragenden ampts halben billich zw gemute gefuhret — vnd endlich eintrechtiglich dahin geschlossen, das wir solche furstehende fehrlichkeit nicht verschweigen, sondern, so viell vnß darumb bewust, vnser ordentlichen vnd von Godt gegebenen Obricheit berichtsweise anzeigen vnd vermelden wollen, — sampt vberreichung der furnehmsten Artickell, so wir wider ihn haben — —:

I.

Anno 1572, ehe ehr auß milter handtreichung vnd funderung eines Ehrbarn Radts dieser Löblichen Stadt Hannover wieder gen Wittenberg verreiset, ist ehr in der Collation gewesenn inn seines freundes Hermenn Clawsinges behausung, vnd daselbst eine vnnötige Disputation angefangen mit Herrn Johann Overmeier vnd vnter andern geredet furnemlich von dem hochwirdigenn Sacramente des Altars, darein ehr denn ohne allenn schew den Sacramentierern zw Wittenberg beygefallen vnd D. Lutherum, heiliger seliger vnd loblicher gedechtnisse wieder Gott, ehre vnd alle billichkeit sampt seiner bekentenisse vnd schrifften wieder die Sacramentierer geschrie-